

Allannguutissatut siunnersuut

uunga

Uunga siunnersuut: Aalisarnej pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2015-imeersoq.

Pingajussaaneernissaanut Naalakkersuisunit saqqummiunneqartoq.

§ 10a-mut

1. Imm. 2 ima allanneqassaaq:

”Naalakkersuisut imm. 1 malillugu sinerissap qanittuani aalisarnermi malittarisassiornermikkut piumasaqaatigisinnaavaat qinnuteqartoq siornatigut assingusumik akuersissuteqarsimanissaa, kiisalu qinnuteqartup ukiumi qaangiuttumi akuersissutiminik atuisimanissaa.”

2. Imm. 2-p kingorna immikkoortumik nutaamik ikkussisoqassaaq:

”Imm. 3. Naalakkersuisut imm. 1-imi 2-milu malittarisassat malillugit aalajangersaanermikkut inuit siusinnerusukkut inuussutissarsiutigalugu aalisarnissamik akuersissuteqarsimasut immikkut pisinnaavaat.”

Allannguutissamut siunnersuummut nassuiaatit.

Nassuiaatit nalinginnaasut

Aalisarnermut Inatsisartut inatsisaata allannguutissaatut siunnersuut saqqummiunneqarpoq Aalisarnermut, Piniarnermut Nunalerinermullu Ataatsimiititaliap 9. maj 2015-imi isumaliutissiissutaa tunngavigalugu, taamaalilluni inuit siunnersuutip atuutsilerneqannginnerani inuussutissarsiutigalugu aalisarnissamut akuersissutillit mattunneqarnissaat pinngitsoortinniarlugu.

Ataatsimiititaliap inassutaa naapertorlugu aalajangersagaq ilanngunneqarsimavoq, tassani immikkut akuersisoqarsinnaalerluni inunnut ukiut imaluunniit ukiup siuliani akuersissuteqanngitsunut periarfissiissalluni, taamaalilluni inuit aalisarnerminnik unitsitsigaluarsimasut (ass. umiunermikkut, napparsimanermikkut, ilinniarnermikkut imaluunniit tunitsivissaaleqinermikkut unitsitsisimasut) inuussutissarsiutiminnik aallartitseqqissinnaanissaannut periarfissaqarniassammata.

Aalajangiiffigisassatut siunnersuutit aningaasaqarnikkut sunniuteqassanngillat.

Allannguutissatut siunnersuummi peqqussutinut ataasiakkaanut oqaaseqaatit

Nr. 1-imut

Aalajangersakkakut qularnaarniarneqarpoq inuit inuussutissarsiutigivillugu aalisartut kisimik

inuussutissarsiutigalugu aalisarnermi peqataasinnaanissaat. Aalajangersakkamili mattussisoqanngilaq immikkut akuersissuteqarsinnaanissamik, aalisagaqassuseq tamatumani aalajangiisuussalluni. Naalackersuisut taamaalillutik sumiiffiit ilaat aalajangersimasut malittarisassanit tunngaviusut ilaannit aalajangersakkamut uunga naapertuuttumik aalajangersakkanit ilaatissinnaanngilaat, sumiiffinni pineqartuni aalisarsinnaanissamut tunngavissaqarpat.

Aalajangersakkakut Naalackersuisut pisinnaatippat malittarisassiorsinnaallutik aalisarnissamut akuersissutinik tunniussiniarnerminni piunasaqaateqarsinnaallutik, tassa qinnuteqartoq ukiup siuliani assingusumik aalisarnissamik akuersissuteqarnissaat (licens), kiisalu qinnuteqartup ukiup siuliani akuersissumminik atuisimanissaa ilanngullugu eqqarsaatigalugu.

Aalajangersakkami uani eqqarsaatigineqarput inuit siornatigut inuussutissarsiutigalugu aalisarnissaminnut akuersissuteqarsimannngitsut, kiisalu inuussutissarsiutigalugu aalisarnissamut akuersissummik inatsisip atuutilereernerata kingorna qinnuteqartunut. Aaqqissuussamik aqutsineq ima aaqqissuunneqassaaq, inuit inatsisip atuutilinnginnerani inuussutissarsiutigalugu aalisarnissaminnut akuersissuteqareersut siunissami aalajangersagaq malillugu akuersissummik tunineqarnissaannik mattunneqannginnissaannut aaqqiisoqassalluni.

Nr. 2-mut

Aalajangersakkakut tunngavissiisoqarpoq immikkut akuersissuteqarnissamik periarfissiisoqarnissaanik, taamaalilluni inuit aalisarnerminnik unitsitsigaluarsimasut ass. umiunermikkut, napparsimanermikkut, ilinniarnermikkut imaluunniit tunitsivissaaleqinermikkut unitsitsisimasut inuussutissarsiutiminnik aallarerteqqissinnaanissaannut periarfissaqarniassammata. Aalajangersagaq inuussutissarsiutigalugu aalisartunut inuussutissarsiummullu uteqqikkusuttunut akuersissutinik qinnuteqartunut atuutsinneqarpoq.